



Sesida dals

Communitgà ils

Protocol nr.

22 d'avrigl 2024

24 d'avrigl 2024

353/2024

Dumonda da la fracziun da la PPS

concernent l'execuziun giudiziala en il chantun Grischn
(emprim sutsegnader Stocker)

Resposta da la Regenza

Cuntrari al «nausch attestat» che vegn fatg valair pertutgant l'execuziun giudiziala en la dumonda sin basa d'ina istorgia da medias nundifferenziada, poi vegnir ditg, che l'execuziun giudiziala è absolutamain moderna en il Grischn, malgrà las pretensiuns pli e pli severas. I constat dentant, che la mancanza da persunas spezializadas sa manifestescha er en l'execuziun giudiziala, cun tut sias consequenzas negativas. Fatg èsi, che l'occupaziun dals plazs en l'execuziun da chastis en l'entira Svizra è suttamessa a fermas fluctuaziuns en tut ils stabiliments e ch'ils stabiliments na pon betg regular questas fluctuaziuns. Actualmain èn ils stabiliments occupads zunt fitg. *Tar la dumonda 1:* En il Stabiliment giudizial Realta po l'arrest administrativ tenor il dretg da persunas estras (AAE) vegnir exequì mo pli per in curt temp, q.v.d. fin che la dretgira ha controllà l'arrest resp. fin l'expulsiun immediata. Perquai ha l'Uffizi da migraziun e da dretg civil (UMDC) fatg ina cunvegna cun il chantun Turitg davart trais plazs per il AAE en il center dal AAE dal chantun Turitg (praschn da l'eroport). Plazs d'arrest betg occupads custan 70 francs per di, plazs d'arrest occupads 285 francs per di ed – en la partiziun speziala – 325 francs per di (a partir dal 1-1-2025 370 francs per di e 420 francs per di). Senza reservaziun custa in di pli che 400 francs. L'onn 2023 èn uschia resultads custs da 170 605 francs per il UMDC respectivamain per il chantun Grischn.

Tar la dumonda 2: Er en il futur stattan blers plazs a disposiziun al UMDC mo per paucs dis. Sin questas assegnaziuns n'han l'Uffizi per l'execuziun giudiziala (UEG) ed il Stabiliment giudizial Realta nagina influenza. Ils 12 plazs restants van enavos a l'execuziun normala averta. Ord vista actuala èsi da partir dal fatg, ch'ina part pli gronda da las entradas ord las dunsenas vegnia cumpensada. Ma tschertas adattaziuns architectonicas èn anc necessarias. Quellas vegnan fatgas proximamain.

Tar la dumonda 3: Ils custs prognostitgads per locals (custs da gestiun) tenor la missiva dals 26 da matg 2015 davart la construcziun d'in nov stabiliment giudizial

serrà a Realta, Cazas, carnet nr. 6/2015-2016 (missiva) cuntegnan quatter posiziuns: mantegniment, provediment e dismessa, taxa e contribuziuns sco er controllas/surveillance ed èn vegnids inditgads cun 1 424 600 francs. En ils custs per locals che vegnan scuntrads calculatoricamain mintga onn vegnan integrads dentant supplementarmain ils custs da reparaziun, d'assicuranza e d'administraziun. Ils custs calculatorics per locals da la praschun Cazas Tignez han importà l'onn 2023 3 540 484 francs. Da quels han importà sulettamain las retenziuns per reparaziuns, che n'eran betg inclusas en la missiva, bundant 1 700 000 francs. Ils custs da personal èn l'onn 2023 cun 11 508 985 francs in pau pli bass che inditgà en la missiva cun 12 028 400 francs, medemamain èn ils retgavs cun 16 615 454 francs pli bass ch'en la missiva cun 20 669 700 francs. En il preventiv 2024 èn ils retgavs dentant creschents en cumparegliaziun cun il preventiv da l'onn precedent. La differenza envers la missiva dastgass sa reducir ulteriuramain. Perquai ch'i sa tracta d'ina situaziun mumentana, pon las cifras puspè sa preschentar autramain l'onn 2024.

Tar la dumonda 4: Ils indicaturs ch'èn decisivs per l'argumentaziun en la missiva, derivan da las statisticas da quel temp. L'execuziun da chastis e da mesiras e la clientella assegnada èn sa midadas fermamain dapi lura. Il manaschi dal Stabiliment giudizial Cazas Tignez mussa, che las finamiras ch'eran vegnidas eruidas per la missiva e che concernan l'occupaziun e las entradas ord las dunsenas, èn suttamessas a fermas variaziuns. In'occupaziun mesauna previsa da 95 % n'è betg realistica en quel senn, ch'ils 12 plazs d'arrest d'inquisiziun e da segirezza ston vegnir registrads da maniera equivalenta en la statistica, cumbain ch'il UEG n'ha nagina influenza sin quests geners d'arrest. La divergenza en connex cun las dunsenas è d'attribuir cunzunt a la partiziun da psichiatria forensica (PPF) planisada. Il basegn «urgent» da plazs PPF ch'existiva anc l'onn 2015, è sa diminuì. Las 20 cellas PPF èn ussa plazs per l'execuziun speziala. Per quests plazs è la dunsena (429 francs) bain pli auta che per l'execuziun normala (321 francs), dentant lunsch davent dals 770 francs ch'eran vegnids calculads per in plaz PPF. Ultra da quai aveva il UEG presumà ina dunsena da 510 francs per ils 10 plazs da la partiziun da vegliadetgna (analogamain al Stabiliment per l'execuziun giudiziala Lenzburg). Il Concordat da la Svizra Orientala davart l'execuziun da chastis ha dentant fixà questa dunsena a 429 francs.



En num da la Regenza

Il president:

Dr. Jon Domenic Parolini

Il cancellier:

Daniel Spadin